


民國佛教期刊文獻集成

任繼愈題

第 10 卷



內 學

中國書店

內學

第三輯

——民國十五年支那內學院年刊——

內
學
第
三
輯

內學第三輯目次

支那內學院院訓釋上篇……………歐陽漸（一）

釋師訓第一

作師一 求師二 師體三 師道四 關謬五 哀亡六

釋悲訓第二

體相一 差量二 威力三上 威力三下 功德四 起悲五 勸學六

諸家戒本通論……………呂卓微
劉存樞（四九）

一 諸家戒本之統系

二 諸家戒本之異點

三 戒本歧異之原因

四 根本戒本及其流傳

附論律學與十八部分派之關係

佛學概論各章導言……………王恩洋（一〇三）

一緣生論導言

二世間論導言

*

*

*

*

安慧三十唯識釋略抄……………呂澂（一一五）

入論十四因過解……………呂澂（一四三）

*

*

*

*

本院事記……………（一六一）

一研究部例會記

二大學部教學記

三樹因研究室成立記

四歡迎日本佛教徒考察團記

本刊因世變遲印臨時刪稿數種以致篇幅減少讀者諒之——編者識

支那內學院訓釋上篇

歐陽漸學

訓支那內學院舉四句。曰師曰悲曰教曰戒。次第釋之。

釋師訓第一

作師一

有出類拔萃之物類。固應有出類拔萃之人類。即應有出類拔萃之思想。出類拔萃之先覺。與夫先覺覺後覺之事。而師之爲物以立。識與識皆充法界。皆相梵網。故人與人。有情。有情與人。有情與有情。皆相繫屬。皆相平等。性分質分。莫不皆有師之爲物者在。充人之量。充有情之量。天地合其德。日月合其明。四時合其序。鬼神合其吉凶。充人之量。充有情之量。利利塵塵。法界法爾。位之育之。無餘而滅度之。是故人之所以爲人。有情之所

以爲有情。莫不皆有作師之責者在。佛者第一義也。師者第一義也。今而欲作師。是之謂作佛。菩提心者第一義也。師者第一義也。今而欲作師。是之謂發心。果之胎孕曰因。因之產生曰果。其爲物不二。但厚薄堅脆濃淡終始之差別。第一義之果必本於第一義之因。第二義之因不可得第一義之果。作佛即作佛耳。發心即發心耳。作師而已耳。索食而蒸沙。需潤而陽燄。東的而西矢。北轍而南輓。是故不能。今天下荒亂矣。推根究極。豈不曰但知有己都不負責之由致耶。夫此但知有己都不負責。又誰實使然耶。澡髮讀書天壤名立。國人師友新知舊習。冉冉悠悠。寒暑數十。曾不聞詔之第一義。告之以作師。有英挺之姿。凌霄之志。曰古之人。古之人。非斥大慢。即目狂騃。嗟乎冤哉。此慢若狂。毗盧遮那頂上行。宗門何爲贊之。爾見甚輒禮拜。又何爲斥之。且孔子又何爲惡鄉愿而思魯之狂士哉。(今時有謂聖經深理不適孩提當廢讀經。嗟乎冤哉。並此冥種而亦蕩然。有死之極無生之氣矣。)反覆沈錙。誰能超然。非無奇士。不甘隨同。然而第二義之因終不得第一義之果。神明潛蟄。劣菌彌密。徐而移之。回而旋之。終亦必止。知有己都不負責而已矣。又學佛者誰不曰難行苦行。而奈何不曰作師。師者第一義也。難苦第二義也。無所謂難。而後乃能行難。變魚飼虎。

稱鷹炙鹿。夫亦晚食安步而已耳。無所謂苦而後乃能行苦。熱鐵洋銅青蓮赤蓮。夫亦操縵安絃而已耳。苟作師也。唯曰衆生。念念衆生。悲之所至無所不至。月在上方。清流濁流。容光等照。如或不然。已視爲難。況能行難。已視爲苦。況能行苦。僻執舛戾。終以自敗。何足道哉。難者曰。師者第一義也。若是則參第一義已耳。何爲獨作師。曰。覷破無明鱗角一人。弘法傳燈。菩薩度衆。宗門徹悟不少大機。然多獨覺。是故大乘不捨衆生。作師第一。又難。作之君作之師。不捨衆生一也。何爲獨作師。曰。能爲師然後能爲長。能爲長然後能爲君。故師也者。所以學爲君也。然君也者。所以學爲師也。十王大業。天人師果。由前而言於師。取資。由後而言於師爲的。唯世出世皆應作師。嗟乎。天下同心。曷聞斯語。投袂而起。語在華嚴。菩薩摩訶薩。常生是心。我當於一切衆生中。爲首爲勝。爲大。爲妙。爲微妙。爲上。爲無上。爲導。爲將。爲師。爲尊。乃至爲一切智智依止者。語在瑜伽。善男子。善女人。見諸濁惡衆生。十隨煩惱之所擾亂。能發下劣聲聞心者。尙難可得。況於無上正等菩提。我當發大菩提心。令此惡世無量有情。隨學於我。起菩提願。

求師二

發願作師。實踐作師。復乎尙矣。而乃不知師有其真。作有其法。蒼莽孤特。艱苦卓絕。神之不寧。心之不平。唯私唯隘。唯亂唯慢。大願奇難。復溺而陷。豈不冤哉。以是因緣。作師方便。求師第一。師有二義。一法爾義。二善巧義。法爾義者。凡物滋生。法爾有因。法爾有緣。緣至而因通。緣慳而因塞。孤特無枝。安能扶蘇。錢鏐交夷。誰若待時。徒涉萬里。何如舟車。荒漠之指南也。迷茫之洲渚也。歧途之鄉導也。險道之商主也。智慧之於師也。一也。因由自辦。緣必依他。唯先德之他。與同法之他。均足以增上也。一也。善巧義者。生滅陰陽。苦樂盛衰。恩怨憶忘。過現未來。支配迭相。若是者爲史事。爲言文。爲思想。而皆謂之有漏。史事不獲現。言文不可道。思想不能到。絕對不待。唯證乃會。若是者謂之無漏。夫所謂學者。亦史事。言文思想已耳。不現不道不到之境。烏乎能入。學之徑絕。入之術窮。徘徊狐疑。邪見叢起。不忍世間有無漏事。嗟乎冤哉。思想者。獨一無二之物也。天下若有超思之軌。不許超軌之思。既許超軌之思。胡乃不忍世間有無漏事。然而徑絕。然而術窮。望而不能即。思而不能由。其奈之何哉。絕而能融。窮而能通。不謂善巧。豈可得乎。漏但常陽。無漏但藏。非謂衆生無無漏種。既有其種。必得其顯。天下有不可親而引之以同類者。陽燄方諸。火騰水液。

是也。天下有不能真而引之以相似者。噉頤而鳴嚶鳥出林是也。師能聖言。聖言者無漏之等流也。是之謂同類之引。師能施聞。受聞者無漏之托變也。是之謂相似之引。初但隨順。浸假相似。浸假臨入。浸假而無漏。當陽漏種潛藏。於斯時也。不謂善巧豈可得乎。師有二義。法爾善巧。實踐作師。學道歸命而不求師。豈可得乎。難者曰。後佛師先佛。先佛師誰佛。心佛生無差。不妨我作古。曰。事無其前。自我作古。古既可因。何勞虛牝。文史不用而遞迭結繩。圖籍不探而乘槎通漢。是之謂不知類。又難。世無孔子不應在弟子之列。世不出佛誰可爲師。曰。依法不依人。雪山半偈。羅刹可師。纓絡十無盡戒。夫婦六親互爲師授。無常迅速。長劫孤露。不應我慢。焦種滅祜。又難。大丈夫事超祖越佛。理非佛專。我亦佛說。曰。諸法法性。若佛出世。若不出世。常住不異。四十九年未說一字。爾若證真說亦無說。無說已同佛說。誰爲超佛。有說尙異佛說。況能超佛。今日且謀證真。固應借徑佛說。嗟乎。天下同心曷聞斯語投袂而起。語在華嚴。菩薩爾時作如是念。我以一句佛所說法。淨菩薩行故。假使三千大千世界大火滿中。尙欲從於梵天之上投身而下。親自受取。况小火坑而不能入。語在華嚴。善男子。若欲成就一切智智。應決定求真善知識。勿生疲懈。勿生厭足。

皆應隨順弗見過失。時善財童子一心憶念依善知識事。善知識敬善知識。於善知識起慈母想。於善知識起慈父想。得聞法已歡喜踊躍。頭頂禮足繞無數匝。殷勤瞻仰悲泣流淚辭退南行。

師體三

師以知見爲體。不以得果或但儀式爲體。此中理者。攝大乘論入所知相多聞熏習如理作意。能悟入者決定勝解資糧菩薩。若師得果不能淹貫而唯顯通。求法弟子從何得聞。聞既無得。憑何作意。意且誤作。安能勝解。若唯儀式色見聲求。尙行邪道。衣冠優孟寧容相應。是故法苑義林引十輪經云。若無初三沙門。必不得已污道中求。其有破戒而不壞見者。親近承事聽聞法要。若破見苾芻誑惑有情。令生惡見。師及弟子俱斷善根。當墮地獄。如是死屍臙臙爛臭。若與交遊共住同事。臭穢熏染失聖法財。壞戒有見因得續戒。善根既斷戒亦隨無。故唯知見是天人師。此中教者妙法蓮華。諸佛世尊大事因緣出現於世。開示悟入佛之知見。大涅槃經四。諸佛所師所謂法也。瑜伽師地說有三師。亦主知見。第一大師。所謂如來立聖教者。開許制止一切應作不應作故。其二紹師。第一弟子如彼

尊者舍利子等傳聖教者。其三襲師。謂軌範師若親教師。若同法中能令開悟能令憶念隨聖教者。紹師襲師時時教授教誡轉故。當知三師能說傳說及隨說故。師以知見爲體。理亦如是。教亦如是。濬淪知見求以是資。教以是師。是故顯揚聖教成就十事名說法師。一者解了法義。六法十義善解了故。二者能廣宣說。多聞聞持其聞積集故。三者具足無畏。法不傾動復何所畏。於刹帝利大衆等中聲不嘶破汗不流腋念無忘故。四者言詞善巧。語工圓滿八分成就故。五者法隨法行。不唯聽聞語言爲極故。六者威儀具足。說正法時手足不亂故。八者勇猛精進。聞未聞法常樂不疲故。九者說法無厭。常爲四衆廣長宣說故。十具足忍力。訶責輕慢不報不戚故。若爲師者具有知見能如顯揚十事而行。則能使人踴躍歡喜。則能使人有所悔悟。則能使人當下發心。則能使人即贖慧命。

師道四

師體曰慧。所謂知見。師道曰悲。所謂爲人之學。充人之量。天地合其德。日月合其明。四時合其序。鬼神合其吉凶。天地不隔。日月無依。四時不拘。鬼神無私。合天之人復禮克己。是故學亦是爲人之學。教亦是爲人之教。師亦是爲人之師。是故教人大學曰。古之欲明明

德於天下者。教人爲仁之方曰。己欲立而立人。己欲達而達人。一言而可以終身行之。曰其恕乎。己所不欲。弗施於人。孔家師道有如此者。胎卵溼化。色想有無。及與俱非。我皆令入無餘涅槃。而滅度之。無或人我衆生壽者。盡未來際。利樂有情。發心以前。舉足下足。常願衆生。發心以後。展轉善根。回向衆生。必使衆生無慳無貪。必使衆生慈悲喜捨。必使衆生佛之知見。必使衆生放大光明。衆生廣大。至何境界。修證淺深。至何位次。衆生盡佛。己乃是佛。衆生是棄。是爲自棄。是故種姓初殖。止是衆生。極果終圓。止是衆生。三世諸佛。爲師之道。有如此者。道之不明也。自私自利。以爲學。攘奪壓迫。以爲政。而其所以爲師者。解惑授業而已。有何道之能傳。而其所以爲業者。衣食住爲業。發展維持強權爲業。物質爲業。人生日用支配爲業。而其所以解惑者。解其業所不通而已。今夫數十周寒暑。數千年史事。數萬里方軌。數千百羣團體。誠不足宥人之思。充人之量。天地之大也。人猶有所憾。孔家此言。何曾六合以外。置而不議者哉。因果範圍。伊誰能立。而必展轉根據。不許超逾。以是而學。以是而教。盡大地人。滔滔皆是。往哲有言。師道立則善人多。善人多則國理。蓋自自私自利之學興。攘奪壓迫之政行。而師道亡矣。

關謬五

不得已而立教。不得已而制學。不得已而作師。皆非本然。無非方便。律不許說出家過。何以涅槃維持比丘付諸國王大臣長者居士。佛法寄於聲聞。何以涅槃大經獨付囑諸菩薩。修行必離闍芮。何以維摩詰經父母不許出家發菩提心。即是出家。羯磨凜遵無違。何以善戒經中像前受戒得果成佛同歸一致。法通而窒之奈何。法廣大而隘之奈何。法超而範圍之奈何。法唯一不二而歧之奈何。法有其意而迹象求之奈何。非僧不許爲師。非出家不許爲僧。種種封畦。創爲異議。執之不移。遂使大教日即式微。凌夷至於今日也。嗟乎冤哉。當揭至教。開示羣迷。

一、唯許聲聞爲僧。謬也。摩訶般若波羅蜜經云。我得阿耨多羅三藐三菩提時。以無量阿僧祇聲聞爲僧。又云。我當以無量阿僧祇菩薩摩訶薩爲僧。龍樹智論釋云。釋迦牟尼佛千二百五十比丘爲僧。無別菩薩僧。彌勒菩薩文殊師利菩薩等以無別僧故。入聲聞僧中次第坐。有佛爲一乘說法。純以菩薩爲僧。有佛聲聞菩薩雜以爲僧。如阿彌陀佛國菩薩僧多聲聞僧少。按此經論有菩薩僧。有聲聞僧。有聲聞菩薩雜僧。非唯許